

Colegio Arubano no tin rector:

Desde januari Tim Croes no ta fungi como rector di Colegio Arubano mas

Den nos edicion di Bon Dia Aruba di ayera a publica un articulo tocante un mayor di un estudiante di Colegio Arubano cu a trece su preocupacion dilanti pa loke ta un situacion cu a sucede cu ta involucra un maestro un estudiante. Relaciona cu e articulo aki Tim Croes, ex rector di e scol, kier clarifica cu su persona no ta rector mas di e scol desde comienso di e aña aki.

Den e articulo, a base di informacion manda den un email anonimo pa Bon Dia Aruba, e myoar pa trece dilanti e situacion cu lo mester a sucede na comienso di aña, riab dia di parada di fakkel pa ta exacto. Segun e mayor aki a splica, e maestro en cuestion, inicialnan B.F., lo a mishi/fula inadecuadamente cu un estudiante.

E mayor ta sigui splica den varios email cu e maestro aki

ainda ta trahando na Colegio Arubano y cu no ta mira cu ta haci algo pa defende e alumnunan. Ademá a agrega cu e mesun maestro aki ta forma parti di un grupo di e scol cu lo ta biahando pa Hulanda pronto y esaki ta algo cu e, cu algun otro mayor, no ta di acuerdo cune.

Den un combersacion cu SMOA, stichting encarga cu Colegio Arubano, a splica cu di nan banda a haci investigacion y basa riba e resultadonan di dicho investigacion a duna e maestro aki e castigo cu nan a mira ta adecua, cual tabata un schorsing y warning cu ta contene medidanan estricto cu e maestro mester atende su mes na dje.

SMOA a splica cu primeariamente e suceso cu ta trece dilanti no a sucede na scol, tabata pafo di scol. Ademá resultadonan di e investigacion ta indica cu ta trata di un grupo di amigo cu a dicidi cu



bay hunto fakkel. Pa e moitbo aki nan a tuma e medida di duna e maestro un schorsing y un warning y no retira e maestro.

Den e email anonimo cu a yega na mesa di redaccion di Bon Dia Aruba e mayor preocupa tambe ta menciona cu e rector di Colegio Arubano, sin menciona nomber specif-

ico, no ta haci nada.

Sr. Tim Croes, ken tabata rector di Colegio Arubano a tuma contacto cu Bon Dia Aruba ayera mainta pa clarifica cu su persona no ta rector di Colegio Arubano mas. El a splica cu na luna di december el a entrega su carta di retiro den cual el a indica cu desde januari en adelante e ta retira como rector di Colegio Aru-

bano.

El a subraya cu e suceso aki no a pasa bou di su tempo como rector y pues e parti cu ta bisa cu e rector no ta haci nada no por relacion'e cu su persona tampoco.

Ademá, sr. Croes a indica cu despues di su retiro Colegio Arubano no tin rector.

Tereno di hotel St. Regis tabata eigendom antes y despues a cambia bira erfpacht na 2006

Manera ta conoci diadomingo ultimo un grupo di activista y ciudadano a organiza un accion di protesta riba beach situa dilanti St. Regis hotel. A protesta aki, anuncia pa varios dia, a hala atencion di un cantidad di persona, y polis tambe tabata na altura y a presenta pa mantene e ambiente calmo. Polis presenta tabata informa ciudadanonan di kico ta e situacion cu e tereno di hotel y kico ta loke mag y no mag segun ley.

Pa varios siman caba e topico aki ta uno cu a ricibi hopi atencion di tanto medionan di comunicacion como riba rednan social. Ciudadanonan na mas di un ocasion a expresa nan disgusto y indignacion pa e hecho cu e hotel a tuma over casi full e espacio di lama su dilanti cu parasol- y stoelnan cu nan a pone. Esaki a hiba na e accion di protesta.

Durante e accion di protesta Cuerpo Policial tabata presente no solamente pa sigura cu tur cos ta cana calmo y segun ley, pero tambe pa informa esnan cu tabata protesta kico ta e situacion cu e tereno en cuestion.

Polis a splica cu a base di



informacion ricibi directamente for di DIP, e tereno en cuestion ta un tereno cu ta eigendom, pues propiedad priva, cu a ser bendi desde aña 1990 y cu no a ser desaroya te aworaki.

E polis tabatin un mapa cu a bin for di DIP den cual por mira e liñanan cu ta marca e propiedad di tereno cu ta di e hotel, te unda esaki ta yega y kico ta loke ta beach publico.

E informacion aki tabata contradeci informacion cu Bon Dia Aruba a ricibi anteriormente for di tanto prome minister demisionario Evelyn Wever-Croes, y ex minister di Infraestructura y actual parlamentario Otmar Oduber tocante e mesun tereno aki.

Mirando e confusion cu esaki por a causa, Bon Dia Aruba a tuma contacto un biahá mas cu prome minister y parlamentario Oduber pa confirma e informacion.

Informacion cu prome minister a manda, cual el a ricibi for di DIP, ta splica cu e tereno tabata eigendom. Desde epoca colonial prome cu 1938, tabatin un club eyan. Na 2006 nan a entrega tereno na gobierno, y gobierno a duna esaki den erfpacht pa timeshare hotel. Na 2014 a convirte den hotel cu 300 camber y na 2019 a baha e cantidad.

Parlamentario Oduber a ratifica e informacion aki y a indica cu antes berdad e tereno tabata eigendom, pero na



2006 a cambie y dun'e den erfpacht, segun e por corda, ora a duna permiso pa un hotel bin eyan. Esaki, el a informa, tabata parti di un negociacion e tempo ey entre

gobierno y Starwood.

Tanto prome minister y parlamentario Oduber a confirma cu e tereno aki ta un tereno erfpacht.